

Pemandu wanita sebabkan kematian penunggang basikal didenda

SIBU: Mahkamah Majistret Sibu semalam menjatuhkan hukuman denda RM9,000 atau penjara sembilan bulan ke atas seorang wanita atas pertuduhan memandu dengan tidak cermat dan bertimbang rasa sehingga menyebabkan kemalangan yang mengakibatkan kematian seorang penunggang basikal pada November tahun lepas.

Majistret Romario Jonoj menjatuhkan hukuman itu setelah mendengar serta

menerima pengakuan bersalah tertuduh, Monica Yeo, 25.

Monica terdahulu dituduh memandu sebuah kereta dengan tidak cermat dan bertimbang rasa terhadap pengguna jalan yang lain pada 17 November 2025, jam lebih kurang 1 pagi di Jalan Dr Wong Soon Kai.

Sehubungan itu, dia didakwa atas pertuduhan yang dibacakan di bawah Seksyen 43(1) Akta Pengangkutan Jalan 1987, yang sabit kesalahan

boleh dikenakan denda tidak lebih RM10,000 dan penjara tidak melebihi 12 bulan.

Berdasarkan fakta kes, pada hari kejadian tertuduh sedang memandu sebuah Perodua Myvi di Jalan Dr Wong Soon Kai dan pada masa sama mangsa sedang menunggang basikal.

Kereta yang dipandu tertuduh telah melanggar basikal yang ditunggang oleh mangsa, menyebabkan mangsa mengalami kecederaan sebelum

disahkan meninggal dunia kira-kira jam 1.59 pagi oleh pegawai perubatan Hospital Sibu.

Siasatan pihak polis mendapati kemalangan itu berpunca daripada tertuduh yang memandu kereta dengan tidak cermat dan bertimbang rasa terhadap pengguna jalan yang lain.

Pendakwaan kes dikendalikan oleh Timbalan Pendakwa Raya Mohd Syazani Izzaddin Abdul Muadzam.